



CONVENIO DE COLABORACIÓN ENTRE A CONSELLERÍA DE CULTURA, EDUCACIÓN E UNIVERSIDADE E O COLEXIO OFICIAL DE BIÓLOGOS DE GALICIA, PARA A ORGANIZACIÓN E DESENVOLVEMENTO DA OLIMPIADA DE BIOLOXÍA E PARA O SEU RECOÑECIMENTO COMO ACTIVIDADE DE INNOVACIÓN EDUCATIVA

Santiago de Compostela, 31 de marzo de 2022

REUNIDOS

Dunha parte, D. Román Rodríguez González, conselleiro de Cultura, Educación e Universidade (en diante, a Consellería), que actúa en virtude das facultades atribuídas no artigo 34 da Lei 1/1983, do 22 de febreiro, reguladora da Xunta e da súa Presidencia, de acordo co seu nomeamento polo Decreto 112/2020, do 6 de setembro, e no das atribucións que lle confire o Decreto 198/2020, do 20 de novembro (DOG nº 242, de 1 de decembro), polo que se establece a estrutura orgánica da Consellería de Cultura, Educación e Universidade.

Doutra, D. José Antonio Fernández Bouzas, con DNI nº 32759840C, no exercicio das súas competencias como decano do Colexio Oficial de Biólogos de Galicia, entidade constituída polo Decreto 237/2003, do 27 de marzo, con domicilio social na rúa Banquete de Conxo, nº 6, de Santiago de Compostela, e con poder suficiente para a suscripción deste convenio, segundo consta no artigo 34 dos estatutos do Colexio, aprobados mediante Decreto 150/2008, do 3 de xullo, da Consellería de Presidencia, Administracións Públicas e Xustiza, actuando como coorganizador en Galicia da Olimpíada de Biología.

As partes recoñécense reciprocamente, no carácter con que interveñen, plena capacidade xurídica para a sinatura deste convenio e, para tal efecto,



EXPOÑEN

I. Que o Estatuto de Autonomía de Galicia, na redacción dada pola Lei orgánica 1/1981, do 6 de abril, no seu artigo 31 atribúelle á Comunidade Autónoma de Galicia a competencia plena da regulación e administración do ensino en toda a súa extensión, niveis e graos, modalidades e especialidades.

Ademais, mediante o Real decreto 1763/1982, traspásanse á Comunidade Autónoma de Galicia as funcións e servizos da Administración do Estado en materia de ensino non universitario.

II. A Lei orgánica 2/2006, do 3 de maio, de educación, modificada pola Lei orgánica 8/2013, do 9 de decembro, para a mellora da calidade educativa, recolle nos seus artigos 102, 104, 105 e 106 o compromiso das administracións educativas na planificación da formación permanente do profesorado e no fomento das actividades de investigación e innovación, garantindo unha oferta diversificada e gratuíta e establecendo as medidas oportunas para favorecer a participación do profesorado.

III. No ámbito da Administración autonómica de Galicia, a Consellería é o departamento que ten atribuídas, entre outras, as competencias e funcións en materia de promoción de proxectos de investigación e innovación educativa. Que, para este efecto, co obxecto poder actuar en todos os ámbitos sociais, debe colaborar, na medida do posible, coas diversas institucións e entidades que operan dentro da Comunidade Autónoma de Galicia.

IV. A Consellería, mediante a Orde do 14 de maio de 2013 pola que se regula a convocatoria, o recoñecemento, a certificación e o rexistro de actividades de formación permanente do profesorado en Galicia, recolle no seu artigo 37 a homologación a participación do profesorado en proxectos de innovación impulsados polas administracións educativas como actividades de formación



permanente. Determina, así mesmo, que a valoración en horas de formación para cada proxecto de innovación virá determinada na convocatoria correspondente ata un máximo de 50 horas por actividade.

V. Que o Colexio Oficial de Biólogos de Galicia ten entre os seus fins promocionar e fomentar o progreso da bioloxía, o desenvolvemento científico e técnico da profesión, así como a solidariedade profesional e o servizo da profesión á sociedade, así como colaborar coa Xunta de Galicia ou con calquera outra Administración ou organismo público no exercicio das súas competencias, nos termos previstos nas leis.

VI. Que é de interese para o Colexio Oficial de Biólogos de Galicia establecer un programa de acción para incentivar e mellorar o ensino e a aprendizaxe da bioloxía, así como profundar nos coñecementos desta materia no marco do ensino secundario, nos centros de Galicia, a través da organización e desenvolvemento da Olimpíada de Bioloxía.

VII. Que o Colexio Oficial de Biólogos de Galicia é delegado institucional da Asociación Olimpíada Española de Bioloxía e actúa en representación dela.

Consecuentemente con todo o indicado, a Consellería e o Colexio Oficial de Biólogos de Galicia manifestan a súa vontade de asinar un convenio de colaboración durante o ano de acordo coas seguintes

CLÁUSULAS

Primeira. Obxecto

Este convenio ten por obxecto o recoñecemento como actividade de innovación educativa da preparación e acompañamento do alumnado participante na olimpíada científica de Bioloxía, tanto nas súas fases locais como na nacional.

Así mesmo, ten por obxecto promover a formación dos docentes de ensino secundario e a súa actualización metodolóxica e científico-técnoloxica, así



como fomentar neles a necesidade dunha aprendizaxe activa e participativa, onde se impulse o método científico e, por último, ampliar as súas competencias profesionais mediante unha formación axeitada en temas de innovación e investigación educativa.

Segunda. Obrigas do Colexio Oficial de Biólogos de Galicia

Mediante a sinatura deste convenio, o Colexio Oficial de Biólogos de Galicia comprométese a realizar as seguintes actuacións:

- Coorganizar, promover, difundir e realizar a Olimpíada de Bioloxía, poñendo os medios ao seu alcance para conseguilo.
- Informar ao profesorado de ensino medio e á Consellería das condicións, lugar e datas de celebración da Olimpiada de Bioloxía.
- Informar ao profesorado de ensino medio da existencia dun recoñecemento e homologación da súa dedicación a preparación e acompañamento do alumnado para a Olimpíada de Bioloxía.
- Entregarlle á Consellería unha memoria final de acordo co previsto na cláusula oitava deste convenio.
- Respectar a obriga imposta polo artigo 13.5 da Lei orgánica 1/1996, do 15 de xaneiro de protección xurídica do menor (LOPXM), introducido pola Lei 26/2015, do 28 de xullo, de modificación do sistema de protección á infancia e á adolescencia, no sentido de non ser condenado por sentenza firme por algún delito contra a liberdade e indemnidade sexual.

Terceira. Obrigas da Consellería

Pola súa parte, a Consellería comprométese a realizar as seguintes actuacións:



- Apoiar e difundir as fases locais da olimpiada de Bioloxía (olimpiada galega), e a participación na fase nacional da olimpiada.
- Recoñecer estas fases como actividades de innovación educativa cunha certificación ao profesorado participante equivalente a 15 horas de formación permanente do profesorado no caso da fase autonómica e 25 horas na fase nacional. Se un/unha docente participa en ambas fases, recibirá un único certificado cunha equivalencia de 40 horas de formación permanente do profesorado.

Cuarta. Información básica sobre protección de datos persoais

1. Os datos persoais recadados neste procedemento serán tratados na súa condición de responsable pola Xunta de Galicia - Consellería de Cultura, Educación e Universidade, coa finalidade de levar a cabo a tramitación administrativa que se derive da xestión deste procedemento e a actualización da información e contidos do seu expediente persoal.

2. Co fin de darlle a publicidade esixida ao procedemento, os datos identificativos das persoas interesadas serán publicados conforme ao descrito nesta norma reguladora a través dos distintos medios de comunicación institucionais de que dispón a Xunta de Galicia, como son os diarios oficiais, páxinas web e os taboleiros de anuncios.

3. As persoas interesadas poderán acceder, rectificar e suprimir os seus datos, así como exercer outros dereitos ou retirar o seu consentimento, a través da sede electrónica da Xunta de Galicia ou presencialmente nos lugares e rexistros establecidos na normativa reguladora do procedemento administrativo común, segundo se explicita na información adicional recollida en <https://www.xunta.gal/proteccion-datos-persoais>.

4. En caso de existir diferentes referencias normativas en materia de



protección de datos persoais, neste procedimemento prevalecerán en todo caso aquelas relativas ao Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos.

Quinta. Rexistro de convenios

A sinatura deste convenio suporá o consentimento expreso do colexio profesional asinante deste convenio á Administración para incluír e facer públicos os datos referidos ao convenio, de conformidade coa Lei 1/2016, do 18 de xaneiro, de transparencia e bo goberno, e co Decreto 126/2006, do 20 de xullo, polo que se regula o rexistro de convenios da Xunta de Galicia.

Sexta. Comisión de coordinación, seguimento e avaliación

- Coa finalidade de asegurar o cumprimento deste convenio, crearase unha comisión de coordinación, seguimento e avaliación composta por dous/dúas representantes de cada unha das partes asinantes, presidida polo secretario xeral Educación e Formación Profesional ou persoa en quen delegue.
- As funcións da comisión serán as seguintes:
 1. Impulsar e apoiar a celebración da olimpiada de Bioloxía, tanto nas súas fases locais como nacionais.
 2. Velar conxuntamente polo correcto funcionamento das actuacións obxecto deste convenio.
 3. A avaliación das actuacións, unha vez finalizadas.



O réxime xurídico desta comisión será o establecido na Lei 40/2015, do 1 de outubro, de réxime xurídico do sector público, para os órganos colexiados.

Sétima. Difusión de accións

Na difusión das accións que se poñan en marcha para o desenvolvemento deste convenio (publicidade, comunicación, información, folletos, etc) figurará de forma expresa o Colexio Oficial de Biólogos de Galicia na súa correspondente olimpíada conxuntamente coa Consellería.

Oitava. Xustificación das actividades

Unha vez rematada a Olimpíada de Bioloxía, e a correspondente fase nacional, desenvolvidas durante o exercicio no que se aproben as actuacións, será preceptiva a súa xustificación por parte do Colexio Oficial de Biólogos de Galicia ante a Consellería, a través dunha memoria final de execución na que constará a certificación da relación do profesorado participante.

Novena. Causas de resolución

Este convenio resolverase polas seguintes causas:

- Incumprimento total ou parcial dalgún dos seus puntos
- Transcurso do tempo estipulado sen que se culminen as actuacións acordadas
- O transcurso do prazo de vixencia do convenio sen que se acordase a súa prórroga
- A decisión xudicial declaratoria da súa nulidade.

Décima. Normativa aplicable e xurisdición



Este convenio ten carácter administrativo e os seus efectos rexeranse polo establecido nas súas cláusulas, e quedará suxeito ao disposto polo Acordo da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares, feito público pola Resolución da Consellería de Economía e Facenda, do 8 de abril de 1991.

Aínda que é un dos excluídos do ámbito de aplicación do Real decreto legislativo 3/2011, do 14 de novembro, polo que se aproba o texto refundido da Lei de contratos do sector público, segundo especifica o seu artigo 4, ao non previsto aplicaráselle os principios recollidos na citada lei, co fin de resolver as dúbidas e omisións que puidesen presentarse.

A xurisdición contencioso administrativa será a competente para dirimir as cuestións que puidesen xurdir da aplicación deste convenio.

Décimo primeira. Vixencia

Este convenio estará vixente desde a data da súa sinatura ata o 31 de decembro de 2022, e será prorrogable de forma automática por anos naturais, cos límites establecidos no artigo 49 h) da Lei 40/2015, do 1 de outubro, de réxime xurídico do sector público, salvo que sexa denunciado por escrito por algunha das partes, cun mes de antelación polo menos, por incumprimento dos compromisos que nel se recollen.

Ao estaren as dúas partes conformes co estipulado, asinan dixitalmente este convenio.

O conselleiro de Cultura, Educación e Universidade	O decano do Colexio Oficial de Biólogos de Galicia
Román Rodríguez González	José Antonio Fernández Bouzas